

Cavoretto-Torino 6 XII 1926.

Honorato coidealista,

Cum gaudio me recipe littera de Vos 28 XI.

Si vos adverte me aliquo die ante expeditione de Mondo 1927, me vol mitte ad vos tabula correcto de socios.

Vos habe jure de nomina socios ad API, in modo que charta que vos mitte aqua in pondere charta que socios de vos recipe. In isto modo, vos pote fac numeroso socio, et ob ine majoritate.

Conservatores Esp.istas, Idistas, ut jam Volapükistas, accepta nullo comparatione et discussione.

API hodie habe 420 socio. Numero es minimo. Numeroso socio seque cum interesse isto studio, sed manifesta nullo opinione.

Existe in API esperantistas: Migliorini, Tellini, Meyer, ...

Existe Idistas: Meazzini, Pinelli, etc.

Majoritate hodie adopta latino sine flexione.

Ergo, auxilio de socios actuale ad vos es paucos; sed vos pote obtine magno adhaesione inter publico. Nam programma de Mondo es optimo.

Me concorda cum vos: es necessario de exclude omne questione personale, que disgusta publico

In API omne socio habe jure de adopta regulas que socio praefere. Academia preca omne socio collaboratore de expone regulas de suo lingua.

Russo aut Hungaro que ignora latino et omne lingua neolatino, pote verte latino sine flexione, cum auxilio de vocabulario latino. (Responso ad critica Beaufront in Weltsprache pag. 86).

Vos pote nomina societate de Vos Academia pro Interlingua, sectione suedo, aut sectione idista, aut in alio modo. Si majoritate futuro adopta novo orthographia, pote muta nomine, sicut muta Kadem Volapüka.

Salutationes cordiale, et vivo augurio de successu.